

Hildward Croes y e cancion di Long Roy

ORANJESTAD(AAN)--

Den un comunicado Hildward Croes ta trece lo siguiente dilanti. "Asumiendo mi responsabilidad como autor y compositor di e cancion "A clear message" cu a worde interpreta pa e cantante Long Roy Diabierna ultimo durante e Calypso Contest, cu a tuma lugar na Lago Sportpark, mi kier declara lo siguiente.

Ta mi entendimento y ferviente opinion personal, cu bibando den un pais democratico, cada conciudadano tin e derecho fundamental di por expresa su mes libremente. Momento cu e mester worde nenga e derecho aki, ya e no ta bibando den democracia mas, sino mas bien den dictadura cu tendencia comunista, na unda tur locual worde expresa publicamente, sea via medionan di prensa o den eventonan publico, ta worde censura o controla pa estado.

Den nos pais democratico, periodistanan tin e libertad di expresa nan mes via medionan di comunicacion, mientras nos pueblo ta expresa su mes escogiendo su representantenan. Di e mes forma un compositor ta expresa su mes via e canticanan cu e ta compone y publica.

Mi ta enfatisa cu letranan di e cancion "A clear message" ta mi opinion y expresion personal eherciendo mi derecho fundamental di ta liber pa haci tal y exigiendo respet pa tal.

Un cantante y e musiconan cu ta compaña ta simplemente e via di un compositor pa trece su obra padilanti. Mi kier haci uso di e oportunidad aki pa gradici e cantante Long Roy y e banda The Musical Time cu a dunami e honor di interpreta mi cancion "A clear message" den un forma tan excelente Diabierna ultimo. Ta di lamenta cu un grupito perteneciendo

na un radio station local a manifesta nan opinion di un forma tan baho y a instiga gran parti di publico pa haci mescos.

Al mismo instante mi ta respeta y aprecia tur reaccion y critica, sea constructivo o destructivo, aprobante o desaprobante, demostrando asina cu e derechonan fundamental di cada persona mester worde respeta. Mester worde menciona cu un gran cantidad di persona a complimentami pa por a trece dilanti un cancion conteniendo letranan cu ta bisa un berdad, segun opinionnan personal. A keda demostra claramente cu e publico inteligente a capta y sinti e mensahe di mi cancion.

Ta lamentable si cu den e ultimo añanan nos pueblo ta worde hinca den un tendencia di intimidacion pa por expresa su mes libremente," asina Hildward Croes a trece dilanti.